



Morire... par vîvare

El pare on zogo insulso de parole e inveze la xe na triste realtà, el xe come on tremendo tenporale de quei estivi, da brusare l'olivo e inpizare na candela de la zeriola.

El xe on disastro che stràngola la gente: na vergogna sociale!

La notizia de la morte inprovvisa de Mariarca Terracciano, l'infermiera de 45 ani de l'ospedale San Paolo de Napoli, la xe stà na tragedia che ne ga fato male anca massa.

L'infermiera la ga 'vù on malore, fin che la jera in servizio nel reparto Maternità de l'ospedale, dopo che la gavéa interoto da poco la so protesta, faséndo-se cavare 150 mililitri de sangue al giorno e fasendo el siòpero de la fame, parché no ghe jera stà pagà el stipendio del mese de aprile. Dopo tri dì la xe morta.

No xe acertà che la morte sia stà conseguenza de la dramàtica forma de protesta, ma xe ciare le rason che ga portà a tanto na mama de do putèi de 10 e 4 ani, spaventà da la situazion economica de la fameja, preocupà par le rate in scadenza del mutuo fato par cronparse on tòco de casa. E se sa a cosa se va incontro se no te rispeti el pagamento del mutuo. **"Lo so che può sembrare un atto di pazzia - gavéa dichiarà la dona ai giornalisti che la intervistava, - ma voglio dimostrare che si sta giocando sulla pelle e sulla salute di tutti."**

L'Asl de Napoli, la pigrande d'Italia, no la jera riussa a pagare i stipendi ai so 10.000 dipendenti, parché no ghe jera pi fondi a disposizion.

No se pol dire che fati come questo no i te faga vegner sù na rabia senpre granda, parché no xe permesso che uno gabia da ris-ciare de morire - o adiritura morire! - par vîvare!

Questo xe un caso, ma de quanti altri se vien a savere e che xe causà da la dramaticità de la



Mariarca Terracciano, l'infermiera de Napoli, morta... difendendo el so diritto de vîvare.

situazion economica che stemo affrontando.

Ghe xe, purtroppo, chi no la soporta. Industriali, dirigenti d'azienda, artigiani, piccoli imprenditori, lavoratori che s'è messo in propio: davanti a la vergogna de on fallimento o de dover lassar casa i so operai i cede a la tentazion de farla finìa na volta par tute. No i sa resistere, i debìti xe tanti, i creditori incalza, le banche no li 'juta, le organizasson sindali fa el so mestiere: xe mèjo sparire par senpre.

Anca qua nel nostro Veneto, dove ghe xe l'idea che el fallimento el xe prima de tuto na rovina personale, se xe rivà a 20 persone con responsabilità aziendali, che se ga tolto la vita.

Da Padova a Treviso la storia se ripete, la xe na epidemia: on dirigente d'azienda de 43 ani de Villorba, no 'l se la ga sentia de convocare i sindacati par dirghe che ghe tocava lassar casa i dipendenti e el ga preferio butar-

se soto 'l treno a Castel de Gódego; el ga selto na corda al colo te la baraca drio casa, l'inprenditore edile de Camposampiero, nel Padovan, esasperà dal buso de bilancio de 100 mila euro; se ga tolto la vita naltro artigian imprenditore de Vo' Euganeo, travolto da i debiti e dal fato che da siè mesi no 'l pagava i dipendenti.

E quanto assurde xe le quele che ciamemo "morti bianche", causà da un incidente sul lavoro, dove nel nostro Veneto, semo passà al secondo posto in Italia: de 141 morti, registrà da genaro a aprile 2010 da l'Osservatorio su la Sicurezza, dopo i 25 de la Lombardia, ghe xe el Veneto con 15 morti. No se pole morire de lavoro: chi va fora de casa a la matina ga da 'vere la sicurezza de poder tornare a la sera sano e salvo.

Tute ste tragedie e ste disgrazie le xe contro la vita; la xe dunque na vergogna dover morire... par vîvare!